



Akcija Tužilaštva BiH, SIPA-e i OSA-e UHAPŠEN POSLANIK

Midhat Osmanović, poslanik Stranke za BiH u Parlamentu FBiH, uhapšen u trenutku uzimanja mita od 20.000 KM

• U pritvoru i direktor ZZO TK Velid Torić • Tužilaštvo BiH: Ova akcija je poruka da neće biti nedodirljivih

Na osnovu saznanja Obavještajno-sigurnosne agencije (OSA) BiH, po nalogu tužioca iz Posebnog odjela za organizirani kriminal, privredni kriminal i korupciju Tužilaštva

BiH, pripadnici Agencije za istrage i zaštitu BiH (SIPA) jučer su na području Tuzle lišili slobode Midhata Osmanovića iz Stranke za BiH, poslanika u Parlamentu Federacije Bosne i Hercegovine. *2. strana*



Tužilaštvo BiH, SIPA i OSA uhvatili zastupnika i direktora ZZO

Osmanović uhapšen dok je uzimao 20.000 KM mita!

Pao i Velid Torić, direktor Zavoda zdravstvenog osiguranja • Parlamentarac iz SBiH htio novac da bi osigurao stalno zaposlenje službenici u ZZO koja radi već pet godina

Pripadnici Državne agencije za istrage i zaštitu (SIPA) jučer su u hotelu „Tuzla“ uhapsili Midhata Osmanovića, poslanika u Predstavničkom domu Parlamenta FBiH, inače člana Predsjedništva Stranke za Bosnu i Hercegovinu.

Također, uhapšen je i direktor Zavoda zdravstvenog osiguranja Velid Torić, također kadar SBiH. Razlog njihovog hapšenja je uzimanje mita pri zapošljavanju.

Nastavak pretresa

Osmanović je uhapšen prilikom primopredaje mita u iznosu od 20.000 KM u označenim novčanicama.

Kako saznajemo, Osmanović je htio uzeti novac da bi osigurao stalno zaposlenje uposlenici ZZO TK, koja tamo radi već pet godina, ali ne u stalnom radnom odnosu.

Koordiniranu akciju kodnog naziva „Panter“ izveli su SIPA i Obavještajno-sigurnosna agencija (OSA) BiH, postupajući po naredbama Suda i Tužilaštva BiH.

- U toku je kriminalistička obrada nad osobama lišenim slobode, nakon čega će one biti predate Tužilaštvu BiH na daljnje postupanje. Aktivnosti u akciji „Panter“ se nastavljaju, a o konačnim rezultatima javnost će biti naknadno informirana - saopćeno je jučer iz SIPA-e.

Kriminalistička obrada i saslušanje Osmanović trajali su jučer punih pet sati u hotelu „Tuzla“, a s lisicama na rukama izveden je u 17.30 sati. Vozilom SIPA-e prevezen je u Sarajevo i predat Tužilaštvu BiH. Pripadnici SIPA-e tokom saslušanja su pretresli i automobil kojim se Osmanović dovezao do hotela, a koji se nalazio na obližnjem parking.

Vršeni pritisci

Kako je javila FTV, u vezi sa ovim slučajem saslušan je i v.d. policijskog komesara Samir Aljukić, kojeg je, navodno, upravo SBiH postavila na tu funkciju.

Velid Torić, uhapšeni direktor Zavoda zdravstvenog

osiguranja TK, nedavno je imenovan na ovu funkciju, zahvaljujući izuzetno jakom pritisku koji je inicirao upravo parlamentarac Osmanović.

Navodno je mjesecima Osmanović vršio pritisak na ministricu zdravstva Nerminu Hadžigrahić te sekretara Ministarstva Devletu Čičkušić da potpišu smjenu sada već bivšeg direktora Hazima Rančića (SDA). U vruću fotelju zasjeo je jučer uhapšeni Torić.

Preslaganje vlasti

Priča o pritiscima na ministricu i sekretara Ministarstva ima uporište ako se uzme u obzir da je Nermina Hadžigrahić nedavno ekspresno napustila BPS, stranku koja ju je i delegirala za ministricu, da bi prešla u SBiH. Taj „transfer“ realiziran je jer je BPS izbačen iz vlasti, a posljednjom prekompozicijom njihova mjesta zauzela je SBiH.

Inače, javna je tajna da se Stranka za BiH prekompozicijom vlasti u TK i ulaskom u vladajuću koaliciju u samom startu odrekla ministarskih mjesta, a zauzvrat tražila funkcije direktora. Osmanović je član Predsjedništva Stranke za BiH i predsjednik ove stranke u Lukavcu. On je na prošlim izborima bio i kandidat za načelnika Lukavca, a trenutno je jedan od glavnih kadrova na području Tuzlanskog kantona.

A. MUSLIMOVIĆ


Page: 1

Reach: 50000

Country: BOSNIA AND HERZEGOVINA

Size: 985 cm2

3 / 4



Page: 1

Reach: 50000

Country: BOSNIA AND HERZEGOVINA

Size: 985 cm2

4 / 4

Tužilaštvo BiH: Neće biti nedodirljivih

Na osnovu saznanja Obavještajno-sigurnosne agencije BiH (OSA), po nalogu tužioca iz Posebnog odjela za organizirani kriminal, privredni kriminal i korupciju Tužilaštva BiH, pripadnici Agencije za istrage i zaštitu BiH (SIPA) su na području Tuzle lišili slobode Midhata Osmanovića, poslanika u Parlamentu Federacije BiH, saopćeno je iz Tužilaštva BiH.

Aktivnosti su provedene po naredbi Suda BiH.

Poslanik Midhat Osmanović je pod istragom Tužilaštva BiH i osumnjičen

je za organizirani kriminal u vezi s drugim kaznenim djelima, među kojima i uzimanje mita od jedne osobe, u iznosu od 20.000 KM, radi rješavanja radnog statusa i zaposlenja.

Djelujući koordinirano, tužilac i pripadnici Tužilaštva BiH, agenti OSA-e i pripadnici SIPA-e izvršili su akciju lišenja slobode u jednom hotelu u Tuzli, prilikom primopredaje mita u iznosu od 20.000 KM u označenim novčanicama.

Aktivnosti Tužilaštva BiH, OSA-e i SIPA-e nastavlja se u pravcu otkrivanja

svih osoba uključenih u organizirani kriminal i nezakonite aktivnosti.

Ova akcija pokazuje odlučnost Tužilaštva BiH i policijskih i sigurnosnih agencija da veoma efektivno i brzo reagiraju u ovakvim slučajevima, te da složene akcije okončaju za samo 48 sati.

Također, ova akcija je poruka da je Tužilaštvo BiH spremno da se obračuna sa organiziranim kriminalom i korupcijom u BiH, te da u toj borbi neće biti nedodirljivih, kaže se u saopćenju Tužilaštva BiH.